

# Aalisarnermik piniarnermillu inuussutissarsiutillit inuussutissarsiornerannik siuarsaaneq pillugu Inatsisartut peqqussutaat

Kalaallit Nunaanni inuussutissarsiutinut tapiissuteqartarneq pillugu inatsimmi nr. 134-mi 28. marts 1984-imeersumi § 1 naapertorlugu aalajangersarneqarpoq:

## Kapitali 1

### *Siunertat*

§ 1. Inatsisartut peqqussutiliaatigut siunertarineqartoq tassa aalisarnermik piniarnermillu inuussutissarsiutit naammassiviulluartartut unammillersinnaasullu siunissaq ungasinnerusoq isigalugu suliffissaqartitsisinnaasut siuasarnissaat suliniutitigut ungasinnerusoq isigalugu inooqatigiit aningaasarsiornerannut iluaqutaasinnaasutigut.

*Imm.* 2. Kapitalini 2-mi 3-milu oqaatigineqartut inuit ingerlatseqatigiilluunniit Kalaallit Nunaanni aalisarnermik piniarnermillu ingerlatsisinnaatitaasut inuussutissarsiorneq siuarsarniarlugu Naalakkersuisut inuussutissarsiutit siuarsarniarlugit taarsigassasitillugilluunniit tapiiffigisinnaavaat.

## Kapitali 2

*Inuussutissarsiutit siuarsarniarlugit taarsigassarsianik atukkiussinermi tapiinermilu tunngaviusussat pingaarnerit*

*Ingerlatassatut pilersaarutit, inuussutissarsiutit siuarsarniarlugit taarsigassarsisitsiviusinnaasut*

§ 2. Ingerlatassatut pilersaarutitut inuussutissarsiutit siuarsarniarlugit Naalakkersuisut taarsigassarsisitsisinnaapput:

- 1) Teknikkikkut isumannaatsumik nalilerneqartunut, aamma
- 2) maannakkut siunissamiluunniit aningaasatigut akilersinnaasutut nalilerneqartunut, aamma
- 3) ingerlatassatut pilersaarutigineqartuni iluanaarutissaattut naatsorsuutigineqartut aningaasartuutaajumaartunut naapertuuttutut nalilerneqarpata.

*Ingerlatassatut pilersaarutit tapiiffigineqarsinnaasut*

§ 3. Naalakkersuisut pilersaarutitut makkununga tapiisinnaapput:

- 1) Teknikkikkut isumannaatsumik nalilerneqartunut, aamma
- 2) maannakkut siunissamiluunniit inuiaqatigiit aningaasarsiorneranni akilersinnaasutut nalilerneqartunut, aamma
- 3) tapiiffigineqartoq periarfissaqarpat imminut napatilernissamut.

*Qinnuteqaateqartu, inuussutissarsiutit siuarsarniarlugit taarsigassarsinnaasut*

**§ 4.** Inuussutissarsiutit siuarsarniarlugit taarsigassarsiniartup qinnuteqaataata suliarinerani qinnuteqaat ataatsimut isigalugu naliliiffiginiarneqassaaq ilaatigut matuma kinguliini taasat uppersarsinneqarsimappata:

- 1) Qinnuteqartoq ingerlatsinikkut aqutsinikkullu pisariaqartinneqartunik piginnaassuseqartoq qulakkeerneqarsimalluni ingerlanniakkaminik imminut akilersinnaasumik ingerlatsisinnaanera inuussutissarsiutit siuarsarniarlugit taarsigassarsisitsinissami piumasarineqartunut naapertuuppata.
- 2) Ingerlatsinermi aningaasartuutissatut akiliisinnaassutsimullu naatsorsuusiaticut taku-neqarsinnaappat taarsigassarsiat utertinniarlugit akilersorneqarsinnaasut.
- 3) Qinnuteqartoq nalilinnik pigisaqarnermigut ima ittoq akilersuinissamik pisussaassut-siminik naammassinissinnaalluni aningaasanik atukkaminik taarsiisinnaassuseqartumik.
- 4) Takuneqarsinnaappat akuersissummik tunineqarnermut, aalisarnissamik akuerineqarnermut, aalisagartassinneqarnermut pisortanillu akuersissutinut allanut aallartinniakkanullu pisortanit akuersinissamut nalunaarneqarsimasoq peqqussut manna malillugu inuussutissarsiutinik siuarsaanissamut atatillugu taarsigassarsisitsisoqarsinnaavoq.
- 5) Qinnuteqartoq pilersaarutimi naammassinissaanut inuussutissarsiutit siuarsarniarlugit taarsigassarsinissamik piumasaqaatigineqartunik pigisaqarpat.

*Imm. 2.* Imm.1, nr. 3 malillugu naliliineq pissaaq qinnuteqartup qinnuteqarnerup nalaani aningaasaticut ingerlanera tunngavigalugu. Pissutsit patsisissallit, taamatuttaaq sillimmasii-nermik suliat, eqqartuussivimmi sulianik aalajangiinerit il.il. pissutsit naammassereertinnagit naliliinermut ilaasinnaangillat.

*Imm. 3.* Naliliinissamik tunngavik Naalakkersuisut ilasinnaavaat piumasaralugit inuussutissarsiornermut atasumik siusinnerusukkut atorniarnertit Namminersornerullutik Oqartussanilluunniit tapiissutit paasissutissartaannik tunineqarnissamik nalilerniarlugu qinnuteqartup pi-sussaaffini naammassisimanerai.

*Imm. 4.* Qinnuteqartoq angallammut ataatsimut taamaallaat inuussutissarsiut siuarsarniarlugu taarsigassarsisitsisoqarsinnaavoq. Tamanna atuupportaaq inuk taanna ingerlatseqatigiiffinnik ilivitsumik ilaannakuusumilluunniit arlalinnik piginnittuuppat.

*Qinnuteqartut tapiiffigineqarsinnaasut*

**§ 5.** Inuussutissarsiutigalugu nutaamik sanaamik umiatsiaararsiniarnermut Naalakkersuisut tapiisinnaapput inuussutissarsiutigalugu umiatsiaararsiassaq minnerpaamik isikkanik 16-inik annerpaamillu isikkanik 19-inik takissuseqarpat aammalu Kalaallit Nunaanni inuussutissarsiutigalugu umiatsiaarassatut akuerisaasimappat.

*Imm. 2.* Tapiissutit tunniukkumaneqarnerussapput umiatsiaararsiassanut piniarnermut atugassanut.

*Imm. 3.* Inuussutissarsiutigalugu umiatsiaaqqamik pisinermi umiatsiaaqqap pisiarinerani akiata 75%-ianik tapiissuteqartoqarsinnaavoq. Qinnuteqaateqartoq Qaanaami, Ammassalimmi Ittoqqortoormiuniluunniit aalajangersimasumik najugaqarpat umiatsiaaqqap pisiari-nerani akiata 84%-ianik tapiissuteqartoqarsinnaavoq.

*Imm. 4.* Inuussutissarsiutigalugu umiatsiaararsiniarnermi inuussutissarsiutit siuarsarniarlugit taarsigassarsisitsisoqarsinnaangilaq.

§ 6. Qinnuteqartoq, inuussutissarsiutigalugu nutaamik umiatsiaarartaarniarnermini, § 5 malillugu imaassaaq:

- 1) 18-it 60-illu akornanni ukioqassalluni, aamma
- 2) tapiiffigineqarnissamik qinnuteqarnini ukiunik marlunnik sioqqullugu inuussutissarsiutigalugu piniartutut aalisartutulluunniit allagarserneqarsimasussaalluni qinnuteqarnermilu nalaani taama allagartaqartussaalluni.

### Kapitali 3

*Aalisarnermut piniarnermullu malittarisassat sukumiinerusumik oqaatigalugit*

*Inuussutissarsiutit siuarsarniarlugit angallatinut aalisariutinut taarsigassarsiat inuutissarsiutigalugulu umiatsiaaqqanut tapiineq*

§ 7. Naalackersuisut inuussutissarsiutit siuarsarniarlugit aalisariutinut taarsigassarsisitsisinaapput matuma kinguliini taaneqartut siunertarineqarpata:

- 1) Aalisariummik allannhortiteriniarneqarlunilu iluarsaaniarneqarpat.
- 2) Motoorinik pissarsiniarneqarpat, iluarsaassiniarneqarluni taarsiiniarneqarlunilu.
- 3) Sillimanissamut atortunik pissarsiniarneqarpat.
- 4) Teknikkikkut atortunik allanik pissarsiniarneqarpat.
- 5) Aalisarnermut atortunik ingerlatsinermilu atortunik taamaaqataannik pissarsiniartoqarpat.

*Imm. 2.* Inuussutissarsiutit siuarsarniarlugit taarsigassarsianik aalisariutisiniarnissamut qinnuteqaat nalilerniarlugu, *imm. 1* malillugu aalisariutip ataatsimut aningaasarsiutaanera nalilerniarneqassaaq aalisartup nalinginnaasumik isertarisinnaasai aallaavigalugit.

§ 8. § 5 malillugu tapiissutigineqartut inummut qinnuteqartumut taamaallaat ukiut aqqaneq marlunnngoraangata tunniunneqarsinnaassapput. Tassalu qinnuteqaateqartoq malittarisassat siusinnerusukkut atuuttut malillugit umiatsiaaqqamik pisinissamut Naalackersuisunit taarsigassarsilluniluunniit tapiiffigineqarsimaguni, umiatsiaaqqamik inuussutissarsiummik nutaamik pisinissamut akuerineqarsinnaavoq pissarsinermi kingorna ukiut aqqaneq-marluk aatsaat qaangiuppata.

§ 9. Inuussutissarsiutigalugu umiatsiaaraq Naalackersuisunit peqqussut manna malillugu siusinnerusukkulluunniit malittarisassat malillugit taarsigassarsilluni tapiiffigineqarluniluunniit pisiarneqarsimasooq umiarnikkut, tamakkiisumik ajoqusivinnikkut allatulluunniit sillimasiissutitigut matussusigassamik pisoqarneratigut annaaneqarpat, § 8 soqutinagu inuussutissarsiutigalugu nutaamik umiatsiaararsiniarnissamut tapiissuteqartoqarsinnaavoq:

- 1) Umiatsiaaraq annaaneqartoq naapertuuttumik sillimmasigaasimappat, aamma
- 2) sillimasiinermut taarsiissutit pigineqarpata Naalackersuisunullu tunniunneqarsimallutik Naalackersuisut umiatsiaaraliortumik tamakkiisumik akiliuteqarnissaa siunertaralugu.

*Imm. 2.* Tapiissutit sillimasiissutinit ajoqusiiffigineqarsimasumut taarsiissutit ilaannik, inuussutissarsiutigalugu umiatsiaaqqap annaaneqartup pissarsarinerani akiata ilaata Naalackersuisut tapiissuteqarnerisigut aningaasalersorneqartup procentinngorlugu annertoqataanik ilanngaaffigineqassapput.

*Imm. 3.* §§ 3, 5 aamma 6 malillugit piumasaqaatit aalajangiinermilu tunngaviit atorineqassapputtaaq.

*Inuussutissarsiutigalugu umiatsiaaqqamut tapiissutitutertillugit akilernerneqarnerat*

**§ 10.** Inuussutissarsiutigalugu umiatsiaaqqamik nutaamik pisinermut tapiissutit utertillugit akilerneqarnissaat Naalakkersuisut piumasarisinnaavaat imaattoqarsimappat:

- 1) Tapiissuteqarfigineqartoq ukiuni tulleriinni marlunni inuussutissarsiutigalugu piniartutut aalisartutulluunniit nalunaarsugaasimanngippat.
- 2) Nalilerneqarpat tapiissuteqarfigineqartup qaammatini kingullerni aqqaneq marlunni inuussutissarsiutigalugu umiatsiaaraq pingaarnertut isertitaminut atorsimanngikkaa.
- 3) Pisiarineqarsimasut, § 5, imm. 1 malillugu, allamut tunineqarsimappata tapiissutit tigune-ranniit ukiut arfinillit qaangiutsinnagit.
- 4) Pisiarineqarsimasut, § 5, imm. 1 malillugu, qularnaveeqqusiunneqarsimappata.
- 5) Tapiissuteqarfigineqartup Naalakkersuisunit, § 21, imm. 3 malillugu, piumaffigineqarluni inuussutissarsiutigalugu umiatsiaaqqap ingerlannerani qaammatini aqqaneq marlunni qaa-ngiuttuni nioqqutissiassanik tunisanut uppernarsaat nassiussimanngippagu.
- 6) Tapiinissamut piumasarisat atugassarititaasullu allakkut qaangiinnarneqarsimappata.

**§ 11.** Ukiunut aqqaneq marlunnut tapiissutit aningaasartaat nalikillineqartassapput ukiut tamaasa aqqaneq marlorarterummik.

*Imm. 2.* Tapiissutit utertinneqarnerani, § 10 malillugu, utertitsinissamik piumasaqaat naatsorsorneqassaaq tapiissutit tighuneranniit ukiup nutaap aallartinneranit aqqaneq marlorarterummik ikiliartuaartillugit.

## **Kapitali 4**

### *Inuussutissarsiutit siuarsarniarlugit taarsigassarsinermut atugassarititaasut*

#### *Taarsigassarsiat ikilisarnerat*

**§ 12.** Inuussutissarsiutit siuarsarniarlugit taarsigassarsiat utertinniarlugit akilersorneqarsinnaapput aalajangersimasumik annertussusilinnik akuttoqatigiiaakkanik ernialersukkanillu.

*Imm. 2.* Naalakkersuisut inuussutissarsiutit siuarsarniarlugit taarsigassarsiat ikilisinniarlugit akileeqataasinnaapput taarsigassarsiallip taarsigassarsiat annertussusiviinik ikiliartortitsinera ilutigalugu. Taarsigassarsiallip ernianik akilersuineranut ikilisisitsissutissanik akileeqataasoqarsinnaanngilaq.

*Imm. 3.* Naalakkersuisut tapiissutissat amerlassusissaat aalajangissavaat taarsigassarsianut piffissaq akilersuiffusoq najoqqutaralugu. Inuussutissarsiutit siuarsarniarlugit taarsigassarsiat akilersornerini akilersuutip 50%-ia angullugu tapiissutigineqarsinnaavoq. Tapiineq taanna pisinnaavoq taarsigassarsisitsinermut isumaqatigiissut malillugu aalajangersimasumik ikilisiaalluni akiliutissaq taarsigassarsisumit akilerneqarsimappat.

*Imm. 4.* Naalakkersuisut inuussutissarsiutit siuarsarniarlugit taarsigassarsianut ikilisaatissanut tapiissutit amerlassusissaat atugassarititaasullu allat pillugit malittarisassat aalajangersarsinnaavaat.

#### *Nammineq aningaasaliissutit*

**§ 13.** Inuussutissarsiutit siuarsarniarlugit taarsigassarsisitsisoqartassaaq qinnuteqartoq nammineq aningaasaliissuteqassasoq piumasaqaatigalugu.

*Imm. 2.* Nammineq aningaasaliissutit pisiap akiata minnerpaamik 10%-erissavai Naalakkersuisunullu akilerneqareersimassallutik inuussutissarsiutit siuarsarniarlugit taarsigassarsiat akiliutigineqalersinnagit.

*Imm. 3.* § 7, imm. 1 malillugu inuussutissarsiutit siuarsarniarlugit taarsigassarsisitsinermi nammineq aningaasaliissutit ilaqarsinnaapput pigisanik nalilinnik pissarsiariniakkap tamarmi nalinganut ilaasunik.

*Imm. 4.* Naalakkersuisut nammineq aningaasaliissutip annertussusiata allinissaanik malittarisassaliorsinnaapput.

*Piffissaq akilersuiffiusussaq*

**§ 14.** Inuussutissarsiutit siuarsarniarlugit taarsigassarsianik piffissaq akilersuiffiusussaq, takuuk § 7, imm. 1, sivisunerpaamik ukiunut tallimanut aalajangersarneqarpoq. Taamaattorli § 7-mi imm.1-imi nr. 1 aamma 2 malillugit taarsigassarsianik piffissaq akilersuiffiusussaq ukiunut qulinut aalajangersarneqarsinnaavoq angallammik sanaqqiineq iluarsaassinerlu kiisalu motorimik pissarsineq taarsiinerlu annertuujusimappata.

*Qularnaveeqqusiineq*

**§ 15.** Inuussutissarsiutit siuarsarniarlugit taarsigassarsiat aalisariummi inuussutissarsiut siuarsarniarlugu taarsigassarsiaqarfusimasumi qularnaveeqquserneqartassapput. Qularnaveeqqut sapinngisamik pitsaanerpaamik prioriteteqartinneqassaaq.

*Imm. 2.* Inuussutissarsiutit siuarsarniarlugit taarsigassarsiat sapinngisamik pitsaanerpaamik qularnaveeqquserneqarsimassapput, pigisami nalilimmi inuussutissarsiutit siuarsarniarlugit taarsigassarsisitsiviusumiluunniit qularnaveeqqusiinikkut.

*Inuussutissarsiutit siuarsarniarlugit taarsigassarsisitsinermi atugassarititaasut*

**§ 16.** Inuussutissarsiutit siuarsarniarlugit taarsigassarsianut ernialiussat naafferartumillu akilersuutit Naalakkersuisunit aalajangersaavigineqartassapput. Tullerriaakkamik angeqatigiissaakkanik taarsigassarsiat tunniunneqarsinnaapput.

*Imm. 2.* Naalakkersuisut piumasarisinnaavaat inuussutissarsiutit siuarsarniarlugit taarsigassarsiat tamarmik utertinneqassasut ima pisoqarpat: Erniala ikilisaallunilu akiliutaasartut piffissaq eqqorlugu akilernerqanngippata imaluunniit inuussutissarsiutit siuarsarniarlugit taarsigassarsinermut atatillugu piumasareqqaakkat sumiginnarneqarpat.

*Imm. 3.* Taarsigassarsianik akilersuineq piffissaq eqqorlugu pisarsimassaaq ulloq aki-leeqquneqarnermik kingorna kingusinnerpaamik ullut 30-t qaangiunneranni akilernerqarsimagunik. Tamatuminnga kingusinnerusukkut akiliineq pisimappat aningaasat taarsigassarsiani-neqarsimasut utertinniarneqalissapput taarsigassarsimasup allakkatigut piumaffigineqarnermi tusarlerneqarnermiluunniit kingorna ullut arfineq marluk qaangiutsinnagit erniat naafferartumillu akilersuutit akilersimanngippagit.

*Imm. 4.* Naalakkersuisut taarsigassarsisup piffissami aalajangersimasumi akiliinissaa ukiut marluk tikillugit kinguartissinnaavaat imaattoqarsimappat:

- 1) Inuussutissarsiutit siuarsarniarlugit taarsigassarsiat tamarmiusut nalingisa qularna-veeqqusiussap nalingata 60%-iat sinnerlugu annertussuseqartoq nalilernerqarpat, aamma
- 2) isumaqartoqarpat akiliisinnaanngikkallarnek sivikitsuinnaasoq.

*Imm. 5.* Taarsigassarsiallip imm.4 malillugu akilersuineramik kinguartitsinerup kingornatigut piffissami aalajangersimasumi akiligassanik akilersuinini aallarteqqippagu, piffissaq akilersuiffiusussaq piffissat aalajangersimasut kinguartitsivigineqarsimasut amerlaqataannik sivitsorneqassaaq.

*Imm. 6.* Ukiunit marlunnit amerlanerusunik akilersuinissamik sivitsuisinnaanermik Naalakkersuisut akuersisinnaapput immikkut ittunik pisoqartillugu.

*Akiitsunik annikillisaaneq isumakkeerinninnerlu*

*Ernialersuinerup akiitsunillu ikilisaanerup unitsinneqarnerat*

**§ 17.** Taarsigassarsiat ernialersorneqarnerat unitsinneqassaaq taarsigassarsiat sumiginnar-neqarsimanerannik pissuteqartumik Naalakkersuisut taarsigassarsisitsineq taamaatitippassuk.

*Imm. 2.* Taarsigassarsiat taamaatitinneqarpata, akiitsut ikilisarnissaannut Naalakkersuisut ukiumoortumik tapiissuteqartarsinnaapput, aningaasat qaammatit aqqaneq marluk kingulliit ingerlanerani taarsigassarsialimmit akilerneqarsimasut amerlaqataannik.

*Isumakkeerinninneq*

**§ 18.** Peqqussut manna imaluunniit inuussutissarsiutinut tapersiisarneq pillugu malittarisassat siusinnerusukkut atuuttut malillugit taarsigassarsiat ukiup qaammatisiuteqarfusup naane-ranit ukiut tallimat ingerlareerpata Naalakkersuisut akiligassat ilaat isumakkeerinnissutigisinnaavaat. Akiligassat 150.000 kruuninit ikinninngorlugit isumakkeerinnissutigineqarsinnaanngillat.

*Imm. 2.* Taamaallaat isumakkeerinnittoqarsinnaavoq naatsorsuutigineqarpat taarsigassarsiallip akiligassat tamakkerlugit ukiuni qaninnerni tamakkiisumik utertillugit akilersinnaanngippagit.

*Imm. 3.* Taarsigassarsiallip imm. 2 malillugu akiliisinnaassuseqarnera ukua tunngavigalugit nalilerneqassaaq:

- 1) Akiitsut amerlassusiat.
- 2) Taarsigassarsisup inoqutaasalu aningaasaateqassusiat.
- 3) Taarsigassarsisup inoqutaasalu maannakkut isertitaat siunissamilu isertitassaat.
- 4) Taarsigassarsiallip ukiui.

*Imm. 4.* Naalakkersuisut imm. 1 soqutiginaq akiligassat sinneri tamaasaluunniit ukiut qulit qaangiunneranni isumakkeerinnissutigisinnaavaat, tamatumanili tunngaviussaaq taarsigassarsialik akiliisinnaassuserigunakkani naapertorlugu annertussusilimmik akiligassanik akilersuisimappat.

*Imm. 5.* Taamaallaat inuit isumakkeerinniffigineqarsinnaapput.

*Taarsigassarsianik allanngortitsineq*

**§ 19.** Naalakkersuisut inuussutissarsiutit siuarsarniarlugit taarsigassarsiaaarsut taarsigassarsianut nutaanut allanngortissinnaavaat piffissami aalajangersimasumi akilersuiffissaq pigisap nalillip taarsigassarsiarititanut tunngasup piunissaa sinneruttutut naatsorsuutigineqartoq sinnernagu, imaassimappat

- 1) inuussutissarsiutit siuarsarniarlugit taarsigassarsiaaarsut ukiut tallimat sinnerlugit ingerlareersimappata, aamma
- 2) nalilerneqarpat taarsigassarsiallip tamatuma kingornatigut inuussutissarsiutit siuarsarniarlugit taarsigassarsiat nutaat utertillugit akilersornissaat sapissanngikka.

*Akiligassallit nikinnerat*

**§ 20.** Taarsigassarsiallip peqqussut manna imaluunniit inuussutissarsiutinut tapersiisarneq pillugu malittarisassat siusinnerusukkut atuuttut malillugit taarsigassarsisimasup taarsigassarsiniartumut nutaamut taarsigassarsiaminik tunniussisinaanera Naalakkersuisut akuerisinnaavaat,

taarsigassarsiniartup nutaap pigisat nalillit taarsigassarsiaritinnerinut tunngaviusut tiguppagit taarsigassarsiaqalersullu nutaap inuussutissarsiutit siuarsarniarlugit taarsigassarsi-sinnaassaguni piumasaqaataasut naammassisimappagittaaq.

*Inuussutissarsiutit siuarsarniarlugit taarsigassarsianik tapiissutinillu utertitsilluni akiliineq*

**§ 21.** §§ 10 aamma 16, imm. 2 malillugit inuussutissarsiutit siuarsarniarlugit taarsigassarsisitsineq taamaatinniarlugu Naalakkersuisut aalajangiisinnaapput, inuit ingerlatseqatigiiffilluunniit tunngavissaqanngitsumik peqqussut manna iluaqutigalugu taarsigassarsianik tapiissutinilluunniit pisimappata.

*Imm. 2.* §§ 10 aamma 16, imm. 2 malillugit inuit ingerlatseqatigiiffillu inuussutissarsiutit siuarsarniarlugit taarsigassarsisitaasimasut tapiiffigineqarsimasulluunniit aningaasatigut ingerlanermik allanngornerinik pingaaruteqartunik Naalakkersuisunut nalunaaruteqarnissamik pisussaafeqarput. Naalakkersuisut pineqartut taakku piumasaqarfigisinnaavaat aningaasaqarnerminnut tunngasunik uppersaatinik tuneqqullutik.

*Imm. 3.* Naalakkersuisut inuk umiatsiaararsiniarnermut tapiiffigineqarsimasooq piumasaqarfigisinnaavaa qaammatini ingerlareersuni aqqaneq marlunni umiatsiaaqqamik pisami tu-niniarnerinut uppersaatinik nasseqqullutik.

## **Kapitali 5**

*Ataatsimut aalajangersakkat*

**§ 22.** Naalakkersuisut Inatsisartut peqqussutaata allaffissornikkut aqunneqarnera pillugu malittarisassanik erseqqinnerusunik aalajangersaasinnaapput, taamatuttaaq makku pillugit malittarisassaliorsinnaallutik:

- 1) Inuussutissarsiutit suut ingerlatassatullu pilersaarutit suut inuussutissarsiutit siuarsarniarlugit taarsigassarsisitsivigineqarsinnaasut.
- 2) Nunap ilaani sumiiffiit sorliit Naalakkersuisut inuussutissarsiutit siuarsarniarlugit taarsigassarsisitsiffigisassaneraat.
- 3) Inuussutissarsiutit siuarsarniarlugit taarsigassarsiat ikilisarnerinut tapiissutinik aalaja-ngersaasarnerit.
- 4) Ilinniartitaanermut, aningaasaqarnermut teknikkimullu tunngatillugu qinnuteqaateqartunut ingerlatassatullu pilersaarutinut piumasaqaatit.
- 6) Peqqussutip allaffissornikkut aqunneqarnera, tassani aamma kommunit peqataanerat.

*Ikaarsaariarnermi atortuulersitsinermilu aalajangersakkat*

**§ 23.** Inatsisartut peqqussutaat manna atuutilerpoq 1. januar 2007.

*Imm. 2.* Namminersornerullutik Oqartussat nalunaarutaat nr. 12 12. december 1984-imeersoq inuussutissarsiutinik tapiinermut tunngasoq ataannassaaq peqqussut manna naapertorlugu nalunaarummik taarserneqarserluni imaluunniit atorunnaarserneqarserluni una Inatsisartulluunniit peqqussutaat allat aallaavigalugit.

*Imm. 3.* Piumasarisat Inatsisartut peqqussutaat nr. 4 20. november 1984 inuussutissarsiutinut tapersiisarneq malillugu aamma Inatsisartut peqqussutaat nr. 10 12. november 2001 aalisarnermut, piniarnermut nunalerinermullu tapersiisarnernut tunngasoq malillugu sulii atasut allaffissornikkut aqunneqartuarallassapput atukkiinerit pineranni aalajangersakkat atuuttut najoqqutaralugit.

*Namminersornerullutik Oqartussat, ulloq 20. november 2006*

Hans Enoksen

/

Finn Karlsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut